



**PRAVILNIK
O ZAŠTITI OD POŽARA
NA UNIVERZITETU U SARAJEVU - REKTORATU**

Sarajevo, januar 2026. godine



UNIVERZITET U SARAJEVU

**PRAVILNIK
O ZAŠTITI OD POŽARA
NA UNIVERZITETU U SARAJEVU - REKTORATU**

Sarajevo, januar 2026. godine

Na osnovu člana 59. stav 2. Zakona o visokom obrazovanju („Službene novine Kantona Sarajevo“, broj 36/22 i 28/25) i člana 60. Statuta Univerziteta u Sarajevu, sa pripadajućim izmjenama i dopunama, u vezi sa članom 24. Zakona o zaštiti od požara i vatrogastva FBiH („Službene novine FBiH“, broj 64/09), uz prethodno mišljenje Odbora za normativna pitanja Univerziteta u Sarajevu, broj: 0105-214-4/26 od 12. 01. 2026. godine, na prijedlog rektora Univerziteta u Sarajevu, Upravni odbor je na 44. redovnoj sjednici, održanoj dana 13. 01. 2026. godine, *d o n i o*

PRAVILNIK O ZAŠTITI OD POŽARA NA UNIVERZITETU U SARAJEVU - REKTORATU

DIO I – OPŠTE ODREDBE

Član 1.

Zaštita od požara obuhvata skup mjera i radnji upravne, organizacijske, stručne, tehničke, obrazovne i propagandne prirode, koje se poduzimaju u cilju sprječavanja izbijanja i širenja požara, njegova otkrivanja, lokalizacije i gašenja požara, te zaštite i spašavanja ljudi, biljnog i životinjskog svijeta, materijalnih, kulturnih, povijesnih i drugih dobara i okoliša.

Član 2.

Radi sprječavanja izbijanja požara, otklanjanja opasnosti od požara, spašavanja radnika i imovine ugroženih požarom, ovim Pravilnikom se, u skladu sa zakonskim i tehničkim propisima, uređuje način ostvarivanja prava, obaveza i pitanja organizovanja i sprovođenja zaštite od požara na Univerzitetu u Sarajevu – Rektoratu uključujući i podorganizacione jedinice Univerziteta u Sarajevu (dalje u tekstu: Rektorat).

Član 3.

Mjere za zaštitu od požara propisane ovim Pravilnikom dužni su sprovoditi svi radnici Rektorata, studenti, kao i sva lica koja se nalaze ili zadržavaju u objektima ili prostoru Rektorata (u daljem tekstu: treća lica).

Član 4.

Ovim Pravilnikom se uređuje organizovanje zaštite od požara, mjere zaštite, unutrašnja kontrola, obuka radnika, obaveze organa upravljanja, obaveze radnika i trećih lica, dužnosti u slučaju nastanka požara te druga pitanja u vezi sa zaštitom od požara.

Član 5.

Zaštita od požara organizuje se i provodi u svim objektima i prostorima Rektorata u skladu sa Zakonom o zaštiti od požara, podzakonskim propisima i Planom zaštite od požara. Plan zaštite od požara donosi se kao poseban akt Univerziteta u Sarajevu – Rektorata i predstavlja sastavni dio sistema zaštite od požara, te je obavezan za primjenu za sve radnike, studente i treća lica.

Član 6.

Odredbe ovog Pravilnika primjenjuju se na sve radnike bez obzira na vrstu radnog odnosa, na studente i treća lica koja se nalaze u prostorijama Rektorata.

DIO II – ZAŠTITA OD POŽARA

Član 7.

Zaštita od nastanka požara obuhvata organizovanje i druge mjere koje imaju za cilj otklanjanje uzroka požara, gašenje požara, spašavanje ljudi i imovine te pružanje pomoći nakon požara.

Član 8.

Rektorat je posebno obavezan održavati opremu i uređaje za dojavu i gašenje požara, osigurati prolaze za evakuaciju, upoznati radnike i studente s opasnostima i mjerama zaštite te preduzeti sve mjere za sprječavanje i kontrolu rizika.

DIO III – MJERE ZAŠTITE OD POŽARA

Član 9.

Radi otklanjanja uzroka požara, smanjenja opasnosti od njegovog širenja i omogućavanja gašenja požara, na Rektoratu se utvrđuju mjere zaštite od požara koje obuhvataju:

- pravilno skladištenje zapaljivih materijala,
- zabranu korištenja uređaja koji mogu izazvati požar,
- vođenje tehničke dokumentacije o ispravnosti instalacija,
- obavezno održavanje stabilnih sistema za dojavu i gašenje požara,
- obavezu prijavljivanja kvarova,
- zabranu nestručnih intervencija,
- uklanjanje zapaljivih materijala sa evakuacionih putanja,
- održavanje hidrantske mreže i prilaza hidrantskim tačkama,
- održavanje radnih prostora urednim i bez otpada.

Član 10.

U svim objektima Rektorata zabranjuje se:

- korištenje peći bez vatrostalne podloge,
- upotreba svih vrsta električnih grijalica koje nisu u vlasništvu Rektorata,
- držanje zapaljivih materija u blizini izvora toplote,
- korištenje improvizovanih električnih instalacija,
- pušenje u zabranjenim prostorima,
- skladištenje zapaljivih materijala na nedozvoljenim lokacijama,
- upotreba opasnih tvari pored otvorene vatre,
- radovi sa zapaljivim tečnostima bez provođenja zaštitnih mjera,
- korištenje neprovjerenih plinskih uređaja.

Član 11.

U slučaju održavanja skupova sa većim brojem osoba, Rektorat je dužan organizovati dežurstvo radi zaštite od požara.

Dežurni radnici moraju poznavati lokacije vatrogasnih aparata i postupke evakuacije.

DIO IV – ORGANIZOVANJE I NAČIN UPRAVLJANJA I UNUTRAŠNJE KONTROLE

Član 12.

Radi provedbe mjera zaštite od požara na Rektoratu se organizuje unutrašnji nadzor. Nadzor provodi radnik zadužen za mjere zaštite od požara u rokovima propisanim zakonom.

Član 13.

Nadzor nad ispravnošću električnih, plinskih i gromobranskih instalacija vrši ovlašteno pravno lice. O ispravnosti istih se vodi dokumentacija.

Član 14.

Nadzor nad radom sistema centralnog grijanja obavlja ovlašteni radnik svakodnevno, a jednom godišnje se vrši detaljni pregled sistema.

Član 15.

Radnik odgovoran za zaštitu od požara vrši:

- obuku radnika,
- nadzor nad instalacijama i opremom,
- provjeru ispravnosti sistema,
- prijavu nepravilnosti rektoru putem Službe za upravljanje imovinom i tehničkim poslovima Univerziteta u Sarajevu,
- organizovanje aktivnosti u slučaju požara,
- postavljanje upozorenja i znakova.

Član 16.

Rektor Univerziteta u Sarajevu posebnom odlukom određuje radnika odgovornog za provođenje mjera zaštite od požara te utvrđuje njegova ovlaštenja i dužnosti.

DIO V – UPOZNAVANJE I OBUKA RADNIKA

Član 17.

Rektorat je dužan osigurati da svaki radnik bude upoznat sa:

- opasnostima od požara na radnom mjestu,
- mjerama zaštite od požara,
- načinom rukovanja sredstvima i opremom za gašenje požara,
- praktičnom upotrebom aparata za početno gašenje,
- materijalnom i drugom odgovornošću u slučaju nepridržavanja propisanih mjera.

Član 18.

Upoznavanje radnika sa opasnostima od požara obavezno se vrši:

1. prilikom zasnivanja radnog odnosa, prije raspoređivanja radnika na poslove i radne zadatke,
2. kod izmjene uslova rada, posebno ako se uvode poslovi sa povećanom opasnošću od izbijanja požara,
3. pri prijemu na praksu i stručnoj obuci pripravnika.

Član 19.

Organizovanje zaštite od požara podrazumijeva:

- obuku radnika prema posebnom programu obuke,
- izradu propisanih dokumenata iz oblasti zaštite od požara,
- isticanje uputstava, znakova i upozorenja na vidnim mjestima.

Član 20.

Rektorat je obavezan organizovati obuku i provjeru znanja iz oblasti zaštite od požara najmanje jednom u dvije godine.

Radnici su obavezni pristupiti obuci i provjeri znanja.

Član 21.

Obuka radnika provodi se kroz:

- predavanja,
- praktičnu obuku,

- testiranje znanja (pismeno ili usmeno).

Program obuke čini sastavni dio ovog Pravilnika.

Član 22.

O izvršenoj obuci i provjeri znanja radnika vodi se uredna evidencija od strane lica zaduženog za zaštitu od požara.

DIO VI – OBAVEZE I ODGOVORNOSTI REKTORA, RADNIKA I STUDENATA

Član 23.

Za ostvarivanje i unapređivanje mjera zaštite od požara odgovorni su:

- rektor Univerziteta u Sarajevu,
- radnik odgovoran za provođenje mjera zaštite od požara,
- radnici Rektorata i
- treća lica.

Član 24.

Rektor Univerziteta u Sarajevu:

- donosi Plan zaštite od požara,
- donosi Program obuke radnika,
- osigurava uslove za primjenu svih propisa iz oblasti zaštite od požara,
- osigurava uslove za primjenu Pravilnika,
- organizuje i nadzire provođenje mjera zaštite od požara,
- imenuje odgovorno lice za zaštitu od požara,
- pokreće disciplinski postupak zbog povrede propisanih mjera,
- odobrava nabavku opreme i uređaja za gašenje požara,
- odgovara za ispravnost sistema za gašenje i alarmiranje,
- osigurava otklanjanje nepravilnosti utvrđenih nadzorom nadležnih organa.

Član 25.

Radnik odgovoran za provođenje mjera zaštite od požara:

- predlaže donošenje i izmjene Pravilnika,
- prati primjenu propisa,
- analizira zapisnike nadzornih organa,
- izvještava rektora o nepravilnostima,
- nadzire ispravnost instalacija i opreme,
- obezbjeđuje pregled i servis vatrogasnih aparata,
- vodi sve propisane evidencije,
- rukovodi gašenjem početnog požara prije dolaska vatrogasne jedinice.

Član 26.

Radnici su dužni:

- pridržavati se svih propisanih mjera zaštite,
- upoznati se s opasnostima na radnom mjestu,
- prisustvovati obuci i praktičnom upoznavanju,
- uklanjati moguće izvore požara po završetku radnog vremena,

- koristiti opremu i instalacije na propisan način,
- prijavljivati kvarove i nepravilnosti,
- učestvovati u spašavanju i pružanju prve pomoći u slučaju požara,
- izvršavati naloge rektora i odgovornog lica za zaštitu od požara.

DIO VII – DUŽNOSTI RADNIKA U SLUČAJU NASTANKA POŽARA

Član 27.

Svaki radnik Rektorata, u slučaju nastanka požara ili neposredne opasnosti od požara, dužan je:

1. odmah ukloniti opasnost ako ne ugrožava vlastitu bezbjednost,
2. pokušati ugasiti požar odgovarajućim sredstvima ukoliko to može učiniti bez opasnosti,
3. ukoliko nije u mogućnosti ugasiti požar – odmah obavijestiti:
 - a. odgovornog rukovodioca,
 - b. lice zaduženo za zaštitu od požara,
 - c. u njihovom odsustvu najbližu vatrogasnu jedinicu, policijsku upravu ili centar za obavještanje,
4. učestvovati u početnom gašenju požara korištenjem raspoloživih vatrogasnih aparata i druge opreme,
5. pomagati vatrogasnoj jedinici po dolasku na lice mjesta.

Član 28.

Radnik je odgovoran za provođenje svih mjera zaštite od požara propisanih ovim Pravilnikom.

Radnik koji se ne pridržava propisanih mjera snosi:

- disciplinsku odgovornost,
- materijalnu odgovornost,
- krivičnu odgovornost ukoliko je radnjama ili propustom prouzrokovao požar.

Član 29.

Radnik koji primijeti opasnost od izbijanja požara ili uoči požar dužan je odmah:

- otkloniti opasnost, ili
- pristupiti gašenju požara ako to može učiniti bez rizika po život i zdravlje.

Član 30.

Ako radnik ne može sam ugasiti požar, obavezan je odmah obavijestiti:

- vatrogasnu jedinicu,
- nadležni opštinski organ nadležan za zaštitu i spašavanje.

Član 31.

Rukovođenje gašenjem početnog požara do dolaska vatrogasne jedinice obavlja lice odgovorno za provođenje mjera zaštite od požara, koje je ovlašteno da:

- organizuje dopremu aparata i opreme na mjesto gašenja,
- odredi raspored radnika i njihove zadatke,
- naloži isključenje električne energije i plina,
- odredi upotrebu ličnih zaštitnih sredstava,
- spriječi nastanak panike,
- organizuje evakuaciju radnika, studenata i drugih lica,
- sačuva tragove koji mogu služiti za utvrđivanje uzroka požara.

DIO VIII – ODGOVORNOSTI RADNIKA ZBOG NEPRIDRŽAVANJA MJERA ZAŠTITE OD POŽARA

Član 32.

Nepriдрžavanje odredbi propisa o zaštiti od požara i ovog Pravilnika predstavlja težu povredu radne obaveze.

Svi radnici su dužni prijaviti nadležnom organu svaku povredu radne discipline koja može dovesti do požara.

Član 33.

Težim povredama radne obaveze smatra se naročito:

- izazivanje požara namjerno ili iz nehata,
- upotreba otvorene vatre i pušenje na zabranjenim mjestima,
- zloupotreba i oštećenje opreme za gašenje,
- odbijanje učešća u akciji gašenja,
- neprijavlјivanje požara,
- ometanje gašenja i spašavanja,
- ostavlјanje neopranog ili zapaljivog otpada,
- upotreba svih vrsta električnih grijalica koje nisu u vlasništvu Rektorata,
- blokiranje rada sigurnosnih i alarmnih uređaja,
- sprečavanje pristupa opremi za gašenje,
- neprovođenje periodičnih pregleda opreme i instalacija,
- nedostatak obezbijeđenih aparata i opreme u zgradama,
- nepristupanje obuci iz zaštite od požara.

Član 34.

Svaki radnik koji namjerno ili iz krajnje nepažnje prouzrokuje požar dužan je nadoknaditi štetu, u skladu sa važećim zakonima.

DIO IX – UREĐAJI I OPREMA ZA GAŠENJE POŽARA

Član 35.

U svim objektima Rektorata mora biti postavljena odgovarajuća vatrogasna oprema, uključujući:

- vatrogasne aparate,
- hidrantsku mrežu,
- sisteme za dojavu i gašenje požara,
- drugu opremu propisanu tehničkim normama.

Član 36.

Broj i vrstu opreme propisuje ovlaštena institucija ili projektant zaštite od požara.

Član 37.

Evidenciju o opremi vodi radnik odgovoran za zaštitu od požara.

Član 38.

Vatrogasni aparati postavljaju se na:

- lako dostupna i vidljiva mjesta,

- hodnike i prolaze,
- prostore pored elektro-ormara,
- laboratorije.

Uobičajeni tipovi aparata: S-9 kg, S-6 kg, CO₂-5 kg.

Član 39.

Oko opreme za gašenje požara mora biti obezbijeđen slobodan pristup. Zabranjeno je korištenje opreme u nenamjenske svrhe.

Član 40.

Vatrogasni aparati se postavljaju i u objektima koji imaju stabilne sisteme gašenja.

Član 41.

Hidrantska mreža mora biti izvedena tako da osigura dovoljnu količinu vode i pritiska, uz potpunu funkcionalnost suhe i mokre mreže.

Član 42

Kontrola opreme vrši se:

- vizuelno – svakodnevno,
- periodično – svakih šest mjeseci,
- kontrolno ispitivanje – od ovlaštene pravne osobe.

O izvršenim pregledima se vodi propisana evidencija.

DIO X – PRIJELAZNE I ZAVRŠNE ODREDBE

Član 43.

Ukoliko ovim Pravilnikom nisu regulisana pojedina pitanja iz oblasti zaštite od požara, primjenjivat će se direktno odredbe:

- Zakona o zaštiti od požara i vatrogastvu Federacije Bosne i Hercegovine,
- podzakonskih akata donesenih na osnovu Zakona,
- drugih važećih propisa iz oblasti zaštite od požara.

Član 44.

Za tumačenje odredbi ovog Pravilnika nadležan je Upravni odbor Univerziteta u Sarajevu.

Član 45.

Ovaj pravilnik stupa na snagu osmog dana od dana donošenja, a objavit će se na službenoj stranici Univerziteta u Sarajevu.

**PREDSJEDNIK
UPRAVNOG ODBORA**

Dr.sc. Murat Ramadanović

Broj: 02-1-4-1/26

Datum: 13. 01. 2026. godine

